



Broj: 05-22- 336/20

Travnik, 24. 06. 2020.godine

- Svim načelnicima općina na području SBK/KSB
- Svim općinskim vijećima na području SBK/KSB
- ŠPD/ŠGD „Srednjobosanske šume-Šume središnje Bosne“ d.o.o. Donji Vakuf
- Kantonalna uprava za šumarstvo SBK/KSB
- Sindikalni odbor sindikalne organizacije kantonalnih organa uprave SBK/KSB

**PREDMET: Javna rasprava o Nacrtu Zakona o izmjenama i dopunama Zakona o šumama
SBK/KSB**

U prilogu akta dostavljamo Vam Nacrt Zakona o izmjenama i dopunama Zakona o šumama SBK/KSB a u skladu sa Zaključkom Skupštine Srednjobosanskog kantona broj:01-02-388/20 od 22.06.2020. godine.

Istim Zaključkom, resornom ministarstvu je dat rok od 30 dana za provođenje javne rasprave kako bi se utvrdio Prijedlog Zakona o izmjenama i dopunama Zakona o šumama SBK/KSB.

S tim u vezi, molimo od Vas da se u roku od 15 dana očitujete o Nacrtu Zakona o izmjenama i dopunama Zakona o šumama SBK/KSB te nam dostavite mišljenje, primjedbe, prijedloge i sugestije.

Ukoliko u predviđenom roku ne dostavite svoja mišljenje, primjedbe, prijedloge i sugestije smatramo da podržavate predloženi tekst Nacrta Zakona o izmjenama i dopunama Zakona o šumama SBK/KSB.

Po okončanju javne rasprave, resorno ministarstvo će na temelju prispjelih mišljenja, primjedbi, prijedloga i sugestija, pripremiti Prijedlog Zakona o izmjenama i dopunama Zakona o šumama SBK/KSB te ga uputiti u dalju proceduru.

Dostavljeno:

-naslovu

-a/a



MINISTAR

Salkan Merdžanić mr.sc.

25 /
805
1520

**BOSNA I HERCEGOVINA
FEDERACIJA BOSNE I HERCEGOVINE
KANTON SREDIŠNJA BOSNA / SREDNJOBOSANSKI KANTON
SABOR / SKUPŠTINA
TRAVNIK**

Na temelju članka 131. Poslovnika Sabora Kantona Središnja Bosna ("Službene novine Kantona Središnja Bosna broj 3/04 i 6/13), Sabor Kantona Središnja Bosna na IV. izvanrednoj sjednici, održanoj 22.6.2020. godine, d o n o s i

**Z A K L J U Č A K
O PRIHVAĆANJU NACRTA ZAKONA
O IZMJENAMA I DOPUNAMA ZAKONA O ŠUMAMA**

I.

Prihvaća se Nacrt zakona o izmjenama i dopunama Zakona o šumama kao dobra osnova za izradu Prijedloga zakona o izmjenama i dopunama Zakona o šumama.

II.

Sabor Kantona Središnja Bosna (u daljem tekstu: Sabor Kantona) zadužuje Vladu Kantona Središnja Bosna (u daljem tekstu: Vlada Kantona) i Ministarstvo poljoprivrede, vodoprivrede i šumarstva da pri utvrđivanju Prijedloga zakona o izmjenama i dopunama Zakona o šumama provedu javnu raspravu te da prilikom utvrđivanja Prijedloga zakona uzmu u obzir sve primjedbe i prijedloge iznesene na sjednici Sabora Kantona, primjedbe i prijedloge iznesene tijekom javne rasprave, kao i mišljenja saborskih radnih tijela,

III.

Javnu raspravu će provesti Ministarstvo poljoprivrede, vodoprivrede i šumarstva u roku od 30 dana, uključujući provođenje javne rasprave u općinskim vijećima svih općina na području Kantona Središnja Bosna, Šumskogospodarskog društva „ Srednjobosanske šume“ /Šumskoprivredno društvo „ Šume Središnje Bosne“ društvo sa ograničenom odgovornošću, Kantonalna uprava za šumarstvo i sindiklanu organizaciju iz oblasti šumarstva.

IV.

Ovaj zaključak stupa na snagu danom donošenja i dostavit će se Vladi Kantona i Ministarstvu poljoprivrede, vodoprivrede i šumarstva.

**Broj: 01-02- 388/ 20
Travnik, 22.6 .2020.godine**

PREDSEJDATELJ SABORA

Josip Kvasina dipl.oec.



Na osnovu člana 41. stav (1) tačka c) Ustava Srednjobosanskog kantona ("Službene novine Srednjobosanskog kantona", br. 1/97, 5/97, 6/97, 2/98, 8/98, 10/00, 8/03, 2/04 i 14/04), na prijedlog Vlade Srednjobosanskog kantona, Skupština Srednjobosanskog kantona na sjednici održanoj _____ 2020. godine, donosi

(NACRT)

ZAKON **o izmjenama i dopunama Zakona o šumama**

Član 1. (Izmjena člana)

U Zakonu o šumama ("Službene novine Srednjobosanskog kantona", broj 5/14, 12/15, 8/16 i 7/18), (u daljnjem tekstu: zakon) u članu 5. stav (3) mijenja se prva rečenica i glasi: "Ukupni obim sječa predviđen šumskoprivrednom osnovom za uređajni period po vrstama drveća (četinari, liščari) unutar širih kategorija šuma za šumskoprivredna područja ne može se prekoračiti, te je zabranjeno vršiti sječu u odjelu više od jednog puta u toku uređajnog perioda".

Član 2. (Izmjena člana)

U članu 6. stav (2) mijenja se i glasi: "Saglasnost na godišnji plan gospodarenja državnim šumama, koji je korisnik državne šume dužan dostaviti najkasnije do 30. novembra tekuće godine za slijedeću godinu, daje Ministarstvo u roku od 20 dana od dana prijema godišnjeg plana gospodarenja, a radovi predviđeni godišnjim planom gospodarenja ne mogu se započeti bez pribavljanja saglasnosti Ministarstva".

Član 3. (Izmjena o dopuna člana)

U članu 7. stav (6) mijenja se i glasi: "Za privatne šume izrađuju se projekti za izvođenje radova u šumarstvu ako je doznačena drvna masa veća od 30 m³ po katastarskoj čestici".

Iza stava (7) dodaje se novi stav (8) koji glasi: "Ministar donosi uputstvo o postupku i načinu izrade projekata za izvođenje radova u šumarstvu za privatne šume".

Član 4. (Izmjena člana)

U članu 11. stav (4) mijenja se i glasi: "Rok za tehnički prijem završene sječe u ljetnom periodu (IV – XI mesec) je jedan mjesec, a rok za tehnički prijem završne sječe u zimskom periodu (XI – IV mjesec) je tri mjeseca".

Član 5. (Dopuna člana)

U članu 16. stav (3) na kraju rečenice umjesto tačke stavlja se zarez i dodaju riječi: "te je uposlenicima: Ministarstva, Kantonalne uprave za šumarstvo i korisnika državnih šuma zabranjeno:

- a) vršenje ili sudjelovanje u vršenju bilo kakve preprodaje drvnih i/ili nedravnih šumskih proizvoda;
- b) korištenje položaja (funkcije) ili bilo kojih aktivnosti službe i/ili poslova radnog mjesta za ostvarivanje bilo kojeg ličnog interesa i to: koristi, vrijednosti, poklona, dobiti, usluge, povlastice ili narudžbe) za sebe, za bližeg ili daljeg srodnika ili za interesno povezano lice;
- c) obavljanje samostalne djelatnosti kao osnovnog, dopunskog ili dodatnog zanimanja: sječe, izrade, prerade i prevoza drvnih i nedravnih šumskih proizvoda uposlenicima korisnika državnih šuma raspoređenim na radna mjesta i to: čuvar šuma, kontrolni čuvar šuma, manipulant: uzgoja, krojenja i otpreme; poslovođa sekcije; šef sekcije; šef proizvodnje; upravnik šumarije; izvršni direktor i direktor".
- Iza stava (11) dodaje se novi stav (12) koji glasi: "Pravilnik o prometu drveta i nedravnih šumskih proizvoda te pojedinačnih stabala, dijelova stabala i grana koji potječu iz: privatne šume; poljoprivrednog zemljišta; vodnog dobra; nekategorisanih zemljišnih površina; javnih površina i građevinskog zemljišta, donosi ministar".

Član 6.
(Izmjena člana)

U članu 35. stav (1) mijenja se i glasi:

"(1) Poslove gospodarenja državnom šumom na području Kantona obavlja jedno ili više kantonalnih šumskoprivrednih društava u granicama jednog ili više šumskoprivrednih područja (korisnik državnih šuma)".

Član 7.
(Izmjena člana)

U članu 37. stav (2) riječ: "dvije" se zamjenjuje sa riječi: "četiri".

Član 8.
(Izmjena člana)

U članu 42. stav (1) mijenja se i glasi:

"(1) Naknadu u visini od 3,0% ostvarenog ukupnog prihoda od drvne mase, računajući cijenu drveta na panju i prihoda ostvarenog od sekundarnih (nedravnih) šumskih proizvoda) i 3% od ostvarene dobiti u šumariji koja posluje u granicama matične općine, u skladu s odredbama člana 54. ovog zakona, dužan je plaćati korisnik državnih šuma".

Član 9.
(Dopuna člana)

U članu 50. stav (1) iza riječi: "električnih vodova," dodaju se riječi: "vodova koji omogućuju prenos signala te služnost prolaza ili služnost puta".

Član 10.
(Izmjena člana)

U članu 52. stav (1) tačka a) mijenja se i glasi:

"a) Učestvuje u zaštiti državne šume u skladu sa ovim zakonom".

Član 11.
(Izmjena člana)

Član 53. mijenja se i glasi:

"Član 53.
(Neposredna zaštita i čuvanje šuma)

(1) Korisnik državnih šuma je dužan obezbijediti neposrednu zaštitu državnih šuma i šumskog zemljišta – čuvanje šuma od šumskih požara i drugih elementarnih nepogoda, biljnih bolesti i štetočina, bespravnog prisvajanja i korištenja, kao i drugih nezakonitih radnji, putem organizovane čuvarske službe koja se osniva unutar korisnika državnih šuma.

(2) Korisnik državnih šuma dužan je naknaditi štetu koja je nastala bespravnom sječom na području koje mu je dato na gospodarenje, bez obzira na počinioca bespravne sječe i količinu posječene drvene mase.

(3) Rješenje o naknadi štete iz stava (2) ovog člana donosi šumarski inspektor, a visina štete se obračunava u skladu sa Pravilnikom o načinu obračunavanja naknade štete za oštećene ili posječene šumske proizvode.

(4) Čuvarska služba iz stava (1) ovog člana formira se unutar korisnika šuma po određenim čuvarskim reonima. Čuvarsku službu obavljaju čuvari šuma koje za to ovlasti korisnik šuma,

(5) Čuvar šume može biti lice koje je završilo srednju šumarsku školu III ili IV stepen, koje ispunjava uslove za nošenje oružja i druge uslove za obavljanje javne službe.

(6) Čuvar šume je ovlašteno službeno lice koje ima ovlaštenja u skladu sa ovim zakonom.

(7) Čuvar šume službu obavlja u uniformi, mora biti naoružan i mora posjedovati dokument – legitimaciju čuvara šume kojim potvrđuje status čuvara šume. Legitimaciju imaju i druga stručna lica koja imaju ovlaštenja za poslove zaštite šume.

(8) Dužnosti čuvara šume su:

- a) čuva šumu od šumskih požara na način kako je utvrđeno ovim Zakonom i planovima zaštite šuma od požara;
- b) čuva šumu od bespravnog zauzimanja i korištenja, od bespravnih sječa, sprečava bespravnu izgradnju u šumi i na šumskim zemljištima;
- c) evidentira bespravno posječena stabla u propisane obrasce, obrojčava ih i žigoše šumskim čekićem šumske štete;
- d) prati pojave, stanje i kretanje biljnih bolesti i štetočina te štete nanesene šumi od divljači kao i štetu na divljači, uredno ih evidentira te ih prijavljuje nadležnim organima na dalje postupanje;
- e) čuva lovište, prati stanje divljači i sprečava nezakonit lov i ulazak u lovište;
- f) prati održavanje šumskog reda;
- g) sprečava nezakonito pokretanje drveta iz šume, ubiranje i sakupljanje nedrvnih proizvoda i stavljanje istih u promet;
- h) zaustavlja prijevozna sredstva i pregleda prateću dokumentaciju za prijevoz šumskih drvnih i nedrvnih šumskih sortimenata;
- i) pregleda porijeklo drveta na pilanama i na svim drugim mjestima gdje se drvo drži;
- j) pregleda transport na šumskim putevima;
- k) sprečava odlaganje smeća i drugog otpada u šumu i uništavanje graničnih znakova;
- l) sačinjava službenu zabilješku o protivpravnoj radnji sa neophodnim podacima o izvršenoj radnji, izvršiocima i visini štete;
- m) legitimiše sva lica zatečena u vršenju prekršajnih radnji po ovom Zakonu i krivičnih djela koja se odnose na šume ili za koja postoji osnovana sumnja da su izvršila takva djela;

- n) obavještava policijsku stanicu i šumarsku inspekciju pri Ministarstvu o svim zapaženim nepravilnostima;
 - o) ima i vodi službenu knjigu.
- (9) Za sve bespravne aktivnosti u skladu sa svojim dužnostima iz stava (8) ovog člana, čuvar šume je obavezan bez odlaganja sačiniti službenu zabilješku o protivpravnoj radnji sa neophodnim podacima radi: podnošenja prekršajnog naloga odnosno zahtjeva od strane korisnika šuma prema nadležnom sudu radi pokretanje prekršajnog postupka i/ili podnošenja pisane prijave nadležnom tužilaštvu za bespravnu aktivnost koja ima obilježje krivičnog djela.
- (10) Svako lice je dužno na zahtjev čuvara šume pokazati lične isprave kojim se utvrđuje njegov identitet i isprave za drvo i ostale šumske proizvode u prevozu ili uskladištene, kao i da za zahtjev čuvara šume drvo ili nedrvne šumske proizvode stavljene u promet u suprotnosti sa članom 16. ovog zakona ostavi na licu mjesta ili preveze na određenu lokaciju radi skladištenja istih“.
- (11) Poslovi čuvara šume su poslovi sa posebnim uvjetima rada.
- (12) Posebni uvjeti rada poslova čuvara šume su:
- a) držanje i nošenje vatrenog oružja (kratke cijevi);
 - b) rad pod nepovoljnim utjecajem atmosferskih uvjeta i rad na otvorenom prostoru;
 - c) noćni rad;
 - d) opasnost od divljih i drugih životinja.
- (13) Čuvaru šuma pripada dodatak na plaću na osnovu posebnih uvjeta rada u iznosu od 20% od osnovne plaće“.

Član 12. (Izmjena člana)

U članu 54. stav (5) riječi: "na prijedlog Kantonalne uprave" se brišu.

Član 13. (Izmjena člana)

U članu 55. stav (1) mijenja se i glasi:

"(1) Naknada za korištenje državnih šuma iz člana 42. ovog zakona obračunava se od ukupnog prihoda drveta, računajući cijenu drveta na panju, prihoda ostvarenog od nedrvenih šumskih proizvoda i dobiti ostvarene poslovanjem šumarije na području matične općine, i uplaćuje se:

- a) 1,0% na račun Budžeta Kantona;
- b) 2,0% na račun općine na čijem području se ostvaruje prihod;
- c) 3,0% na račun općine na čijem je području ostvarena dobit poslovanjem šumarije na području matične općine“.

Član 14. (Dopuna člana)

U članu 56. stav (1) dodaje se nova rečenica koja glasi: "Ovu naknadu plaćaju i sva lica na području Kantona koja obavljaju samostalnu privrednu, profesionalnu i drugu dopuštenu i registriranu djelatnost kao osnovno zanimanje“.

Član 15. (Izmjena člana)

U članu 57. stav (1) tačka a) mijenja se i glasi: "upravni i stručni poslovi koji se odnose na državne i privatne šume".

U stavu (2) riječi: ",na prijedlog Kantonalne uprave," se brišu.

Član 16.
(Dopuna člana)

Član 60. stav (2) se dopunjuje tako da se iza riječi: "zakona" dodaje zarez i riječi: "Zakona o inspekcijama F BiH".

Član 17.
(Izmjena i dopuna člana)

U član 63. stav (1) tačka a) se mijenja se i glasi:

a) ako gospodari šumom bez šumskoprivredne osnove i/ili gospodari šumom ne usklađeno sa: šumskoprivrednom osnovom, privremenim godišnjim planom gospodarenja ili godišnjim planom gospodarenja za realizovanje šumskoprivredne osnove i projektom za izvođenje radova u šumarstvu (stav (1) člana 5. i stav (1) člana 6. ovog zakona).

U tački b) iza riječi: "period" dodaju se riječi: "i/ili ako vrši sječu više puta u toku uređajnog perioda".

U stavu (2) riječ: "odgovorna" se zamjenjuje sa riječi: "odgovorno".

Član 18.
(Dopuna člana)

U članu 64. stav (1) iza tačke a) dodaje se nova tačka aa) koja glasi:

"aa) ako ne postupa u skladu sa odredbama Pravilnika o uvjetima koje moraju ispunjavati izvođači radova u šumarstvu".

Iza tačke b) dodaje se nova tačka bb) koja glasi:

"bb) ako su planirana ili započeta sječa ili druge radnje u suprotnosti sa šumskoprivrednom osnovom, s ovim zakonom ili propisima koji su doneseni na osnovu ovog zakona. (član 8. stav (6) ovog zakona)".

Iza tačke f) dodaje nova tačka ff) koja glasi:

"ff) ako ne postupa u skladu sa odredbama Pravilnika o obimu mjera uspostave i održavanja šumskog reda te o načinu njegovog provođenja".

Član 19.
(Dopuna člana)

U članu 65. stav (1) iza tačke m) dodaje se nova tačka mm) koja glasi:

"mm) ako ne postupa u skladu sa odredbama Pravilnika o načinu žigosanja, obrojčavanja, premjeravanja drva te o sadržaju i načinu izdavanja otpremnog iskaza za drvo".

Član 20.
(Dopuna člana)

U članu 66. stav (1) u tački f) iza riječi: "odobrenja" dodaju se riječi: "ili ako kao uposlenik: Ministarstva, Kantonalne uprave za šumarstvo ili uposlenik korisnika državnih šuma postupa suprotno članu 16. stav (3) tački a), b) i c) ovog zakona.

Član 21.
(Dopuna člana)

Iza člana 67. dodaje se novi član 67a koji glasi:

„Član 67a

(1) U roku od tri mjeseca počevši od dana stupanja na snagu ovog zakona, uposlenici Kantonalne uprave za šumarstvo raspoređeni na poslovima neposredne zaštite šuma (čuvari šuma, kontrolni čuvari šuma i ostali namještenici koji rade na poslovima neposrednog čuvanja državne šume) preuzimaju se i raspoređuju na poslove i radne zadatke na neodređeno vrijeme od strane korisnika državnih šuma (šumskoprivrednog društva) bez javnog poziva u skladu sa njihovom stručnom spremom i radnim iskustvom, a preostali uposlenici Kantonalne uprave za šumarstvo u skladu sa njihovom stručnom spremom i radnim iskustvom ostaju raspoređeni u Kantonalnoj upravi za šumarstvo.

(2) Vlada Kantona će u skladu sa knjigovodstvenim pravilima i standardima donijeti odluku o prenosu imovine u vlasništvu Kantona koja je služila obavljanju poslova neposredne zaštite šuma na korištenje ili vlasništvo šumskoprivrednom društvu (korisniku državnih šuma).

(3) U roku od osam dana počevši od dana preuzimanja i raspoređivanja čuvara šuma u šumskoprivredno društvo, Kantonalna uprava za šumarstvo i šumskoprivredno društvo su obavezni provesti postupak usklađivanja sredstava i postupak primopredaje: prava, potraživanja, obaveza, stalnih sredstava, novčanih sredstava, zaliha i razgraničenja i inventara i o istom sačiniti odgovarajuće zajedničke zapisnike o primopredaji.

(4) Korisnik državnih šuma dužan je svoje poslovanje uskladiti sa odredbama ovog zakona u roku od tri mjeseca, počevši od dana stupanja na snagu ovog zakona“.

Član 22.

Ovaj Zakon stupa na snagu narednog dana od dana objavljivanja u "Službenim novinama Srednjobosanskog kantona".

Broj: _____
Travnik, _____ godine

**PREDSJEDAVAJUĆI
SKUPŠTINE SREDNJOBOSANSKOG KANTONA**

Josip Kvasina

OBRAZLOŽENJE

A -PRAVNI OSNOV

Pravni osnov za donošenje Zakona o izmjenama i dopunama Zakona o šumama Srednjobosanskog kantona („Službene novine Srednjobosanskog kantona“, broj 5/14, 12/15, 8/16 i 7/18), (u daljnjem tekstu: Zakon) sadržan je u poglavlju III član 2. tačka c) i i) Ustava Federacije BiH („Službene novine Federacije BiH“, broj 1/94, 13/97, 16/02, 22/02, 52/02, 65/03, 9/04, 20/04, 33/04, 71/05, 72/05 i 88/08) i članu 41. stav 1. tačka c) Ustava Srednjobosanskog kantona („Službene novine SBK/KSB“, broj 1/97, 5/97, 6/97, 2/98, 8/98, 10/00, 8/03, 2/04 i 14/04).

B – OBRAZLOŽENJE PRAVNIH RJEŠENJA

Poglavlje II. PLANIRANJE U ŠUMARSTVU

U okviru ovog poglavlja u stavu 3. člana 5. je sada predviđeno da ukupni obim sječa predviđen šumskoprivrednom osnovom za uređajno razdoblje po vrstama drveća (četinari i lišćari) unutar širih kategorija šuma za šumskoprivredna područja ne može se prekoračiti iz razloga što planirana količina i dinamika sječa za visoke šume sa prirodnom obnovom se ne može i ne smije se ni kojem slučaju prekoračiti za uređajni period, jer se time narušava šumskoprivredna osnova. U stavu (2) član 6. je sada predviđano da saglasnost na godišnje planove gospodarenja državnim šumama daje Kantonalno ministarstvo, a ne Kantonalna uprava za šumarstvo te radovi predviđeni godišnjim planom gospodarenja ne mogu započeti bez saglasnosti Ministarstva, a ne traži se saglasnost Kantonalne uprave za šumarstvo. U stavu (6) člana 7. je sada propisano da se za privatne šume izrađuju projekti za izvođenje radova u šumarstvu ako je doznačena drvena masa veća od 30 m³ po katastarskoj čestici, iz razloga kako bi se spriječile zloupotrebe u šumarstvu, te se dodaje novi stav (8) člana 7. da Ministar donosi uputstvo o postupku i načinu izrade projekata za izvođenje radova u privatnim šumama.

Poglavlje III. PRIVREĐIVANJE U ŠUMARSTVU

U okviru ovog poglavlja u stavu (4) člana 11. mijenja se rok za tehnički prijem radova nakon završene sječe tako da je umjesto dasadašnja tri mjeseca sada propisan bitno kraći rok od 30 dana sa mogućnošću produženja u slučajevima teških i zimskih uvjeta poslovanja. Ovim je skraćen rok tehničkog prijema radova čime se uvećava produktivnost istog posla uzimajući u obzir objektivno teške i vremenske uvjete i okolnosti.

Poglavlje V. PROMET DRVA I NEDRVNIH ŠUMSKIH PROIZVODA

U okviru ovog poglavlja (član 5. Zakona o izmjenama i dopunama) vrši se dopuna stava 3. člana 16. Zakona dodavanjem i preciziranjem radnji, aktivnosti i poslova koji se zabranjuju uposlenicima: Ministarstva poljoprivrede, vodoprivrede i šumarstva, Kantonalne uprave za šumarstvo koja se nalazi u sastavu Ministarstva i korisnika državne šume, kako bi istim uposlenicima bilo zabranjeno činjenje navedenih koruptivnih radnji u ličnom interesu i činjenje ove vrste sukoba interesa, a na štetu općeg i javnog interesa, te se vrši dopuna tako što se dodaje novi stav (12) kojim je propisano da ministar donosi Pravilnik o prometu drveta i nedrvnih šumskih proizvoda te pojedinačnih stabala, dijelova stabala i grana koji potječu iz: privatne šume;

poljoprivrednog zemljišta; vodnog dobra; nekategorisanih zemljišnih površina, javnih površina i građevinskog zemljišta.

Poglavlje XI. EKONOMSKE FUNKCIJE ŠUMA

U ovom poglavlju (stav (1) člana 35.) se mijenja odredba koja je propisivala da na području Kantona poslove gospodarenja državnom šumom je moglo obavljati samo jedno šumskoprivredno društvo (korisnik šuma). Sada se propisuje alternativa (mogućnost) tako da iste poslove sada može da obavlja jedno ili više kantonalnih šumskoprivrednih društava u granicama jednog ili više šumskoprivrednih područja.

U stavu (2) člana 37. mijenja se trajanje mandata članova skupštine korisnika šuma sa dvije (kao kratak rok) na četiri godine kao odgovarajući i uobičajeni rok.

Mijenja se stav (1) člana 42. koji se odnosi na naknadu za korištenje državne šume koji sada glasi: "Naknadu u visini od 3,0% ostvarnog prihoda od drva, računajući cijenu drveta na panju i prihoda ostvarenog od sekundarnih (nedrvnih) šumskih proizvoda) i ___% od bruto prihoda ostvarenog poslovanjem šumarije koja posluje u granicama matične općine, u skladu s odredbama člana 54. ovog Zakona, dužan je plaćati korisnik državnih šuma", čime su dijelom prihvaćene inicijative Općinskog Načelnika Općine Jajce i Općinskog vijeća Općine Dobretići za izmjenu Zakona o šumama i ova izmjena sada propisuju veće naknade za korištenje državne šume na području određene (matične) općine na čije se području iskorištava šuma čime se uvećavaju finansijski prihodi lokalne zajednice.

Poglavlje XII. PROMJENA NAMJENE ŠUMSKOG ZEMLJIŠTA I GRADNJA U ŠUMI

U okviru ovog poglavlja vrši se dopuna stava 1. člana 50. Zakona kojim se dodatno preciziraju slučajevi uspostavljanja prava služnosti pored dosadašnjih propisanih slučajeva prava služnosti na državnoj šumi šumskom zemljištu (u svrhu izgradnje vodovoda, kanalizacije, plinovoda, električnih vodova) tako da se na državnoj šumi i šumskom zemljištu može uspostaviti pravo služnosti i u slučaju: izgradnje vodova koji omogućuju prenos signala te služnost prolaza i puta, a za što postoji interes različitih subjekata (pravnih i fizičkih lica) – korisnika i nadležnih operatera koji se mogu smatrati korisnicima stvarne služnosti.

Poglavlje XIII – ŠUMARSKE INSTITUCIJE

U okviru ovog poglavlja mijenja se tačka a) stav (1) člana 52, tako da sada Kantonalna uprava samo učestvuje u zaštiti državnih šuma u skladu sa ovim Zakonom.

Mijenja se kompletan član 53. tako da je sada Korisnik državnih šuma dužan obezbijediti neposrednu zaštitu državnih šuma i šumskog zemljišta te cjelokupna čuvarska služba i poslovi čuvanja šuma se sada organiziraju i obavljaju unutar šumskoprivrednog društva. Dosadašnje iskustvo i stanje podatka po pitanju nelegalnih sječa je da Kantonalne uprava za šumarstvo kao organ uprave nije uspješno odgovorila zadatku neposredne zaštite i čuvanja šuma na terenu. Podaci sadržani u službenim izvještajima o količini bespravni sječa ne odgovaraju evidentiranim (stvarno utvrđenim) stanjima bespravne sječe na terenu.

U stavu (5) člana 54. riječi "na prijedlog Kantonalne uprave" se brišu kao nepotrebne.

Poglavlje XIV – FINANSIRANJE

U ovom poglavlju izmijenjenim stavom (1) člana 55. Zakona mijenja se naknada odnosno visina naknade za korištenje državnih šuma iz člana 42. Zakona, a izmjena se odnosi tako da se sada 2,0 % ove naknade uplaćuje na račun općine na čijem

području se ostvaruje prihod te se ___ % ove naknade uplaćuje na račun općine na čijem području se ostvaruje isti prihod i to od bruto prihoda ostvarenog poslovanjem šumarije na području matične općine, dok procenat ove naknade koja se uplaćuje na račun Budžeta Kantona (1,0%) ostaje nepromijenjen.

U stavu (1) člana 56. dodaje se nova računica kojom je propisano da naknadu za opće korisne funkcije šuma plaćaju i sva lica (ne samo pravna nego i fizička) na području Kantona koja obavljaju samostalnu privrednu, profesionalnu i drugu dopuštenu i registriranu djelatnost kao osnovno zanimanje" (npr. obrt kao osnovno zanimanje).

U stavu 1. člana 57. mijenja se tačka a) jer se sada iz budžeta Kantona neće finansirati rad čuvarske službe jer ista - po ovom Zakonu o izmjenama i dopunama Zakona o šumama - više ne postoji kao služba u sastavu Kantonalne uprave za šumarstvo kao budžetske organizacije, ali će se iz namjenskih sredstava Budžeta Kantona i dalje finansirati upravni (administrativni) i stručni (šumarski) poslovi koji se odnose na državne i privatne šume.

U stavu (2) člana 57. riječi: „Na prijedlog Kantonalne uprave“ se brišu kao nepotrebne.

Poglavlje XV – NADZOR NAD PROVOĐENJEM ZAKONA

U stavu (2) člana 60. se iza riječi: „zakona“ dodaje zarez i riječi: „Zakona o inspekcijama F BiH“ kao važećeg i osnovnog Zakona koji se primjenjuje i na inspekcijske postupke u oblasti šumarstva i za područje Kantona.

Poglavlje XVI – KAZNENE ODREDBE

Tačka a) stav (1) člana 63. se sada odnosi i na slučajeve kada se gospodari šumom ne samo kada ne postoji šumskoprivredna osnova, privremeni godišnji plan gospodarenja, godišnji plan gospodarenja i/ili projekat, nego kada isto gospodarenje nije i usklađeno sa ovim osnovnim šumarskim aktima.

U tački b) iza riječi: „period“ dodaju se riječi: „i/ili ako vrši sječu više puta u toku uređajnog perioda“.

U stavu (2) istog člana riječ: „odgovorna“ se zamjenjuje sa riječi: „odgovorno“ zbog gramatičke greške u pisanju.

U stavu (1) člana 64. iza tačke a) dodaje se nova tačka aa) koja glasi:

“aa) ako ne postupa u skladu sa odredbama Pravilnika o uvjetima koje moraju ispunjavati izvođači radova u šumarstvu“.

Iza tačke b) dodaje se nova tačka bb) koja glasi:

“bb) ako su planirana ili započeta sječa ili druge radnje u suprotnosti sa šumskoprivrednom osnovom, s ovim zakonom ili propisima koji su doneseni na osnovu ovog Zakona“. (stav 6. člana 8 ovog Zakona).

Iza tačke f) dodaje nova tačka ff) koja glasi:

“ff) ako ne postupa u skladu sa odredbama Pravilnika o obimu mjera uspostave i održavanja šumskog reda te o načinu njegovog provođenja“.

Ovim kaznenim odredbama se dodatno propisuju slučajevi i nepostupanje korisnika šuma ili drugog pravno lice za koje je propisana novčana kazna od 2000,00 do 8000,00 KM.

U stavu (1) člana 65. iza tačke m) dodaje se nova tačka mm) koja glasi:

“mm) Ako ne postupa u skladu sa odredbama Pravilnika o načinu žigosanja, obrojčavanja, premjeravanja drva te o sadržaju i načinu izdavanja otpremnog iskaza za drvo“. Ovom kaznenom odredbom se propisuje poseban slučaj ne postupanja korisnika šuma ili drugog pravnog lica u skladu sa navedim Pravilnikom, što ranije nije bilo propisano.

U članu 66. stav 1. dopunjuje se postojeća tačka f) kojom se dalje navode (preciziraju) fizička lica koja će se kazniti novčanom kaznom za prekršaj u vezi prometa drvnih i nedrvnih šumskih proizvoda i to: uposlenici, Ministarstva, Kantonalne uprave za šumarstvo i Korisnika državnih šuma ako postupaju suprotno odredbama tačke a), b) i c) stava (3) člana 16. ovog Zakona.

Poglavlje XVII – PRIJELAZNE I ZAVRŠNE ODREDBE

Novi član 67a (stav 1) propisuje rok i postupak kojim uposlenici Kantonalne uprave za šumarstvo (čuvari šuma, kontrolni čuvari šuma i ostali namještenici koji rade na poslovima neposrednog čuvanja državne šume) se raspoređuju kod korisnika državnih šuma na neodređeno vrijeme bez javnog poziva, a ostali uposlenici Kantonalne uprave ostaju raspoređeni u Kantonalnoj upravi za šumarstvo. Stav (2) propisuje da će Vlada kantona donijeti odluku o prenosu imovine u vlasništvu Kantona koja je služila obavljanju poslova neposredne zaštite šuma na korištenje ili u vlasništvo šumskoprivrednom društvu. Stav (3) propisuje da su Kantonalna uprava za šumarstvo i šumskoprivredno društvo u roku od osam dana obavezni provesti postupak primopredaje: prava, potraživanja, obaveza, stalnih sredstava i inventara i da su o istom obavezni sačiniti odgovarajuće zajedničke zapisnike o primopredaji. Stav (4) propisuje da je Korisnik državnih šuma (šumskoprivredno preduzeće) dužan svoje poslovanje uskladiti sa odredbama ovog Zakona u roku od tri mjeseca, počevši od dana stupanja na snagu ovog Zakona.

C - NAČIN FINANSIRANJA

Sredstva za provedbu izmjene i dopune Zakona o šumama Srednjobosanskog kantona koja se odnose na izmjenu člana 53. Zakona o šumama – finansiranje čuvarske službe - osiguravaju se iz prihoda šumskoprivrednog društva.